


AVCTARIVM
COMMENTARII
DE BELLO
BOHEMICO
FERDINANDI II.
CÆSARIS

AVSPICIIS
FELICITER GESTO,

Ex quo seditiosissimum Caluinianæ sectæ ge-
nium, & præsentem Europæ statum
licet agnoscere:


AVCTORE


AVBERTO MIRÆO BRUXELLENSI;
S. Theologiæ Licentiato, Protonotario Apostolico, & Sere-
nissimæ ISABELLÆ CLARÆ EVGE-
NIAE, Hispaniarum Infantæ, à Sa-
cris Oratorij.



COLONIAE AGRIPPINAE,
Imprimebat HENRICVS Krafft.

ANNO M.DC.XXII.





AD COMMENTARIUM
DE BELLO
BOHEMICO
AVCTARIVM

AVBERTI MIRÆI, BRUXELL.

IN memorabili ac miraculosa illa, an. 1620. die 8. Nouembr. per Cæsareanos obtēta ad Pragā victoria, inter reliquam prædæ supellestilem, quæ militi nostro amplissima celsit, *Christiani Principis Anhaltini*, Vnionis, vt vocabant, Evangelicæ primarij fabrefactoris, arcana consilia, & litteræ vltro citroque missæ sunt deprehensæ. Ex his nonnemo Commētarium, CANCELLARIÆ ANHALTINÆ titulo, *Cancellaria Anhaltina.* primū Germanicè, post Latinè hoc anno 1621. euulgauit; vt impijssima ac seditiosissima Caluinianorum consilia, ad Catholicæ religionis & Augustanæ confessionis homines extirpandos concepta, vniuerso orbi patefaceret. Illius commentarij primaria aliquot capita hîc lubet delibare.

A 2

Septua-



Septuaginta plus minus anni sunt, cùm è Gallia Caluini heresis occultè in Germaniã irrupit, atq; in Palatinatu primùm ad Rhenum, fauètem sibi Principem inuenit. Omnes Imperij Ordines, cuiuscumque demum professionis essent, plenis comitijs, anno superioris sæculi sexto & sexagesimo, detestabilem sectam, ad regna turbanda ac perdenda natam, exosi, MAXIMILIANO II. Cæsare auctore, iuxta leges pacis annis superioribus stabilitæ, pellendam decreto publico censuerunt. Intercessere nonnulli è molliore ac mansuetiore Lutheri schola, quos iam clementiæ pœnitet, concepta spe, fratres infirmos (sic eos appellabant) tolerantia, temporisque lapsu emendari posse. Emendati sunt, vt leonum ac luporum catuli per ætatem è malis deteriores fieri solent. Cùm numero sensim animi creuerunt: nec iam amplius sese hospites & aduenas ferre, sed de exitio veterum inquilinorum consilia agitare, magna arte lites, more suo, in comitijs ferere, Augustanam Confessionem falsò ac simulatè profiteri, eiusdem Cõfessionis assecclas, quibus suus in Imperio locus, Sinonianis dolis in societatem attrahere, in Catholicos varia crimina, quæ ipsi perpetrassent, conijcere, omnia demum miscere ac vertere.

Quocirca cùm multis iam annis consilia
& vo-

& vota in clancularijs ac vetitis, pro sectæ
genio, coitionibus contulissent, anno de-
mum millesimo sexcentesimo septimo,
VNIO (vt ipsi nuncupabant) EVANGELI-
CA, sed veronimine Calviniana, in aper-
tum erupit, sufflante in primis *Christiano*
Principe Anhaltino, qui cū in Gallia, tum in
Bataua militans, Caluini spiritum profun-
dissimè in pectus admiserat, eiusq; axiomata
politica, seu potius diabolica altissimè im-
biberat. Primū itaque in nuptijs, natali-
cijs, hastiludijs, & vænationibus consilia
clamagitata; post verò palam *Hala-Sueno-*
rum, *Hailbrunna*, *Rottenburgi*, *Noriberga*,
& alibi.

*Vnio Pseudo-
euangelica.
An. 1607.*

TRIVM VIRI demū tres constituti, FRE-
DERICVS Elector & Comes Palatin⁹ Rhe-
ni, CHRISTIANVS Princeps Anhaltinus,
quem dixi, & IOACHIMVS ERNESTVS
Brandenburgicus, cognomento Ansbacensis.
Horum pijs scilicet pro libertate Germani-
ca conatibus fulmen seu Bannum Imperia-
le, in ciuitatem *Donavvertensem* legitimè cō-
tortum, profuit plurimum, effecitque vt
Argentoratum, *Vlma*, *Noriberga* (quas cæ-
teræ vrbes minores, *VVormatia*, *Spira*, *VVeis-*
senburgum ad Rhenum, *Landauia*, *Nordlinga*,
Hala Sueuorum, *Hailbrunna*, *Memminga*,
Campidona, *Rotenburgum*, *Suinfurtum*, *VVintf-*
hemium, & *VVeissenburgum Noricum*, postea
facile

Triumviri.

*Ciuitates
XVI. Im-
periales.*

facile, vt fieri amat, sunt secutæ) Vnioni accederent. Metuebant nimirum sibi ARGENTORATENSES, ob monialium Sanct. Margaritæ aut S. Mariæ Magdalenæ cœnobium recens incorporatum, vt loquuntur, atque euersum; VLMENSES, ob eliminatam Religionem Orthodoxam. NORIBERGENSES, ob Teutonici ordinis domum, contra ius & fas, occupatam. Tentarunt & Electorem Saxonem in societatem pellicere; quasi in eadem cum superioribus naui existeret; ob Misnensem, Merseburgensem & Naumburgensem Episcopatus, iam olim ante annum 1552. quo Pax Imperij est constituta, à maioribus suis occupatos. Sed is abnuuit, & nefariam conspirationem detestatus, priuatim publiceque in comitijs Imperij non semel professus est, nihil sibi cum illis commune esse, nec velle se impedire, quò minus ablata Catholicis, post annum 1553. monasteria ac prædia, iuxta sententiam à Camera Spirensi ac Tribünali aulico Cæsareo latam, restituerentur.

His ipsis temporibus, dissidiũ inter RUDOLPHVM Imp. & MATTHIAM, fratres Austriacos, gliscens, cùm in apertum quasi bellum erupisset, vt erant in omnem occasionem rei ex voto gerendæ intenti, *Anhaltinus*, eiusque fidus Achatès Doctor *Came-*

rarius, ann. 1608. Pragæ apud Rudolphum Cæsarem, falso communium grauaminum prætextu, altius intonuerunt, & inauditis antea comminationibus, per litteras Hala missas, ipsum Imperij caput, & Tribunal aulicum Cæsareum petiuerunt.

Coniuratis itaque numero & animo crescentibus, MAVRITIUS Hassiæ Langrauius, IOANNES FREDERICVS VVirtembergæ Dux, GEORGIVS FREDERICVS Marchio Durlacensis, & alij magno numero proceres accessere, auaritia, metu iudiciorum, aut egestate impellente. Hassum certè inquietudo, & vicini Episcopatus, præ suis montibus, vbertas in causam traxit. VVirtembergicum cupido pariter alieni, & spes libertatis, ne vt vassallus Austriacis dominis clientelam deberet, ad societatem impulit. Durlacensem furia spoliatorum nepotum, pupillorum, vltrices in rabiem egerunt. Ceteros aut ambitio, vt *Fredericum* Palatinum, aut foeda cum luxu egestas vt *Anhaltinum*, aut æs alienum ad bellum suscipiendum incitarunt. Ciuitates denique Imperiales Principum ac Syndicorum artes subdola, & quorundam Senatorum emptæ proditio fefellerunt.

Fuso fugatoque Frederico Rhenensi Palatino, victis ac subactis Bohemis, ubi se sibi relictum vidit BETHLENIVS, nihil studiosius procurandum existimavit, quam ut *Osmanem* Imperatorem Turcicum, hereditarium Christiani nominis hostem, ruptis vicennibus Inducijs, in armorum contra FERDINANDVM societatem attraheret; illius nimirum Virgiliani memor

Flectere si nequeas superos, Acheronta movebo.

Nec precibus tantum aut litteris, sed & amplissimis muneribus, ac prædæ ex latè patentibus prouincijs copiosissimæ certa spe Turcas Tartarosque euocabat. Sed ubi opinione sua tenaciorem iurisiurandi Turcam reperisset, ad artes solitas conuersus, diu multumque in eo desudauit, ut fictis criminationibus *Ferdinandum* Cæsare apud Turcas traducendo suspectum redderet, quasi pacis pertæsus pactas cum ijs Inducias vellet euertere. Id antea sæpius irritò conatu tentarat: ac ubi victrices eiusdem Cæsaris aquilas capiti suo imminere sensit, validiorem utendum ratus ariete, litteras Hungarico idiomate, Ferdinandi nomine, conscribi, eiusdemque sigilli ac chyrographi exacta imitatione communiri iubet: quarum exemplar ex Hungarico Latine redditum hic libet subnectere:

Ferdi-

Ferdinandus II. Dei gratia Hungaria, Bohe-
mia, Dalmatia, Slauonia, Rex, &c. Archidux Au-
stria, Dux Burgundia, Stiria, Carinthia, Carniola,
Marchio Morauia, Comes Tirolis & Ioritia, &c.
Spectabilibus, magnificis, egregijs & nobilibus Ba-
ronibus, Capitaneis, eorumq; Vicegerentibus. salu-
tem & gratiam nostram. Antea mihi fideles opti-
mi, qua ratione factum sit, vt anno superiore con-
tra nos & regnum nostrum arma sumpseritis, ex-
ploratum habemus, & ex fideli nostro Palatino
Hungaria rectè intelleximus. Nimirum Turcici
illius Principis Bethlenij in Hungariam improuisa
irruptio vos ed adegit. Caterum nos gratiam &
beneuolentiam nostram clementer vobis offerimus,
si gratia & clementia nostra vti velitis, si ab ipsius
fidelitate desciscetis, si tam regnum, quàm consinia
ad fidelitatem nostram reduxeritis, ac in ea con-
seruaueritis. Constat siquidem vobis, quod nos in-
fidelibus Turcis vos & regnum non vendidimus,
prout latro Bethlenius. Quin potius in eo sumus, vt
omni vos clementia prosequamur, si ab ipso descii-
ueritis: mensura vobis stipendia exactè numera-
bimus, ac regnum ipsum in veterem libertatem as-
seremus. Atque idcirco tam numeroso cum exer-
citu fidelem nostrum campiductorem expediui-
mus, vt Vacua confestim recuperata, Strigonium
obsideatur Experiantur potentiam nostram, tam
Turca, quam eorum pullus Bethlenius. Vos valere
cupimus. Vienna Austria 20. May anno 1621.

Ferdinandus.

Laurentius Ferenzffi.

A 5

Inscri-

Inscriptio litterarum talis erat. *Magnificis, Generosis, Egregijs Regni nostri Hungaria Capitaneis, Vice-Capitaneis, Comitibus, Baronibus, Cœturiõibus, Decurionibus præsidiorum Vimar, Nograd, Palank, Gyarmat, Zechen, &c. fidelibus nostris, &c.*

Ab instituto recederem, si longiore oratione persequerer, quot in vno scelere flagitia contineantur; si pœnas falsarijs decretas recenserem; si Pandectas ad Legem Corneliam de falsis, retexerem; si rapinas, cædes, ac captiuitates innoxie plebis, si plurium millium Christianorum, in Turcicam seruitutem abductorum, calamitates, si denique incendia, vastitatemque Austriæ illatam per Turcas, huiusmodi litterarum figmentis concitatos, enumerando percerem. Vnum hoc silere non possum nec debeo, multos rebellionis Hungaricæ auctores ac fautores, in his *Tursum Palatinum, Georgium Radosium*, cum fratre, iusto Dei iudicio, per Gaborem veneno sublatos esse.

Bellarminus moritur

Magno Ecclesiæ Catholicæ damno, ROBERTVS BELLARMINVS, S. R. E. Cardinalis, verò elogio HAERETICORVM NOSTRI AEVI MALLEVS, & Antagonista inuictus, hoc anno Romæ Septembri mense decessit. Testamenti eius tabulas, pietatis ac modestiæ plenissimas, quas ex Vrbe accepimus, in exemplum hîc visum est publicare.

IN

IN nomine Domini nostri Iesu Christi. Ego ^{Testamentum eius.}
 ROBERTVS Cardinalis BELLARMINVS,
 presbyter Cardinalis, è Societate Iesu assumptus,
 petij à s. mem. CLEMENTE VIII facultatem
 condendi Testamentum ad pias causas tantum, vt
 certus essem quòd ea, quæ mihi decedenti bona
 temporalia superessent, quæq; dum viuerè, dispen-
 sari pauperibus vel Ecclesiis non potuerant, vix pote
 mea sustentationi necessaria, ad pauperes & Ec-
 clesias redirent. Concessit Pontifex Indultum te-
 standi generalius quàm voluissem. sed nō accepta-
 ui, nisi ad pias causas, vt petieram. Habetur hoc
 Indultum inter alias Bullas mihi concessas, in ma-
 gno folio pergameno, cum plumbo, datum an-
 no Domini 1603. VI. Idus Aprilis, Pontifica-
 tus Sanctissimi Papæ CLEMENTIS VIII.
 anno XII.

Ergò hoc Indulto præsupposito, testamentum
 condidi Capua, cum essem Archiepiscopus eius ciui-
 tatis. Deinde illo abrogato, aliud condidi, sed pro-
 pter mutatas circumstantias, hoc secundo etiam
 abrogato, nunc iterum Testamentum condere sta-
 tui, cum sim annorum LXIX. sed mente & cor-
 pore per Dei gratiam beneualens.

Primum igitur spiritum meum in Dei manus
 commendatum, toto corde exopto, cui ab adolescen-
 tia seruire desideravi; & precor vt me inter Sãctos
 & electos suos, nō aestimator meriti, sed venia lar-
 gitor admittat. Corpus meū non apertum, noctur-
 no tempore, sine alia pompa, ad Ecclesiã Societatis
 Iesu,

Iesu, vel Collegij Romani, vel Domus professa deferri volo: & exequia fiant per solos Patres & Fratres Societatis, sine interuentu sacri Collegij, sine lecto sublimi, sine insignibus vel flabellis, eademq; simplicitate, qua ceteris de Societate iesu fieri solent. Et hac de re, quàm maximè possum, sanctissimum D. N. humiliter rogo, vt desiderio meo satisfaciat.

Quod attinet ad locum sepultura, libenter corpus meum iacere voluisssem ad pedes B. ALOYSII GONZAGAE, mei quondam spiritualis filij; sed tamen superiores Societatis, vbi voluerint, corpus meum ponant. De rebus temporalibus, mihi à Sede Apostolica concessis, vel vndecunque acquisitis, ita dispono.

Haredem vniuersalẽ nomino & instituo DOMVM PROFESSAM ROMANAM SOCIETATIS IESV, in qua Religione nomen dedi. Volo autem vt primum soluantur debita, si qua fuerint, & iura ijs quibus debentur; deinde dentur familiae ad 40. dies, more solito, quæ ad victum pertinent, id est, quod illis taxatum est in pecunia, pro pane, vino, & companatico. Neque aliud eis relinquere possum, cùm ad solas pias causas Testamentum faciendi facultatem petierim; & eadem de causa singulis stipendium siue prouisionem dederim, prater victum. Fratri meo secundum carnem, vel eius heredibus restituatur imago seu quadrum CLEMENTIS VIII. Pontificis Maximi. Nepoti meo ANGELO detur imago seu quadrum
Ro-

ROBERTI Cardinalis DE NOBILIBVS, & vnum è duobus quadris S. CAROLI BORROMAEI, & vna ex paruis Crucibus, quas ad pectus gero, cum Reliquijs inclusis.

Collegio Romano restituantur Annalium Card. BARONII tomi VI. quos mihi accommodauit, & eidem dentur alij sex mei: nam cum hac conditione accepi à Collegio VI. primos tomos, qui nomine meo dati fuerunt Collegio eidem, ab eodem auctore, vt post obitum relinquerẽ integrum opus. Eidem Collegio relinquo vnam è tribus Planetis pretiosis, cum stola & manipulo, quam voluerit, & omnia scripta mea, & totam Bibliothecam; nisi Reuerendissimo Patri Generali videatur Bibliothecam alicui alteri loco Societatis magis egenti applicare. S. MARIAE IN VIA qui Titulus meus est, relinquo vnam è tribus Planetis pretiosis, quam haeres meus dare voluerit. Aliud Titulo meo non relinquo; quoniam satis multũ expendi in fabrica Ecclesiae: vt Fratres illi sciunt, qui hoc ipsum petierunt loco paramentorum, quae illis emere constitueram.

Reliqua omnia bona, quae quocunque modo ad me pertinent seu pertinebunt, siue immobilia siue mobilia, siue se mouentia, siue iura, siue credita, siue sacra ad Capellam, siue profana ad vestiariũ vel cellas varias pertinentiã siue pecunia numerata, siue quacunque alia integra, ad heredem, id est, Domum professam Romanam Societatis iesu, vt dictum est, pertineant volo. Et in illis omnibus

bus & singulis ipsam heredem instituo & nomen.

Pro auxilio anima mea nihil relinquo, vel praescribo; quia parum admodum erit quod ad heredem meum perueniet, ut existimo, cum ego cumulus pecunijs vel rebus pretiosis acquirendis nunquam operam dederim; tum quia confido, in id certo scio, non defuturam huic officio piam caritatem Matris meae, Religionis videlicet Soc. Iesu, ut pro alijs filijs suis nunquam deest: & quemadmodum ego non defui, toto vita mea tempore, pro defunctis Societatis sacrificia & orationes Deo offerre.

Executorem huius meae voluntatis nomino, honoris causa, Ill. *mun.* & Reu. *mun.* Dominum meum Cardinalem ALDOBRANDINUM: labor enim, ut existimo, nullus erit in executione Testamenti huius. Relinquo autem eidem Ill. *mo* Domino meo id, quo pretiosius nihil habeo, id est, Crucem ligneam, Reliquijs pretiosissimis refertam. quarum Catalogus in scrinio, cooperto rubro holoserico, inuenietur.

Hoc Testamentum valere volo, prioribus abrogatus, quae in omnibus & per omnia reuoco, casso, & annullo, etiamsi hoc forte non fuerit cum debitis solemnitatibus factum. Id enim aperte concedit Bulla Summi Pontificis CLEMENTIS VIII. in qua mihi data est facultas testandi, etiam per simplicem epistolam, vel schedulam manu mea subscriptam.

Ego ROBERTVS Cardinalis BELLARMINVS,

NVS, vt supra, instituo, dispono, lego, & testor non solum prefato sed omni meliori modo, die 23. Ianuarij, 1611.

Cæterum **BELLARMINVS** in Monte Politiano (quæ vrbs est Etruriæ, Episcopali titulo insignis) ex **MARCELLI II.** Pont. Max. cognomento Ceruini, sorore natus, adolescens Societati Iesu nomen dedit. In Belgicam missus, annos aliquot **LOVANI**, magna eruditionis fama, Theologiam explicauit, & Latinè concionando, qua erat eloquentia, magnum sibi nomen peperit. In Italiam reuersus, **CONTROVERSIA-
RVM LIBROS**, accuratissima methodo digestos, aduersus æui nostri Sectarios, incredibili omnium Catholicorum applausu ac fructu, publicauit. Et quamuis scripta eius per partes pestilentis cathedræ Ministri in Britannia, Germania, Gallia & Batavia vellicare ac refellere contendant, litus tamen arare frustra que sudare, à suis etiam commilitonibus paissim iudicantur, non secus atque si dentem solido infigant atque infringant. Virum itaque de Ecclesia ac Repub. Christiana optimè meritum, quamuis inuitum ac renitentem, vt erat modestia singulari præditus, **CLEMENS VIII.** anno M.D.XCVIII. **CARDINALEM S. MARIE IN VIA** (quæ est basilica Seruitarum) omnibus applaudētibus, renūtiavit. Exinde

CAPVANVS ab eodem ARCHIEPISCO-
PVS creatus, cū aliquamdiu eā in vrbe re-
sedisset, suisque verbo & exemplo præui-
set, onus illud Angelicis humeris formi-
dandum deponere maluit, quā absens (ad
Vrbē enim reuocabatur pro vniuersę Eccle-
siæ bono) annūis illius basilicæ frui prouēti-
bus aut dignitate. Magna itaq; sanctitatis o-
pinione, anno Christi M. DC. XXI. ætatis
LXXIX. mense Septembri Romę decessit.

*Ioannes
Berchman-
nus.*

Eodem anno, die XIII. Augusti, Romæ
viuere desijt, magna pariter innocentia ac
sanctitatis fama, IOANNES BERCHMAN-
NVS, ex eadem Societate, Dilemij in Bra-
bantia genitus, annum agens secūdum & vi-
cesimum. Solitus is dicere, TRIA MIHI
SVNT CARISSIMA, videlicet Christus
crucifixus, Rosariū Deiparæ, & Regula Soc.
Iesu, CVM HIS LIBENTER MORIAR.

*Helueticorū
Ciuitates
seu Canto-
nes XII.*

Sub scedere Helueticæ Cantones seu Ci-
uitates XIII. continentur. Vrania, Suitia, Sil-
nanja, Lucerna Tigurum, Clarona, Tugum, Ber-
na, Friburgum, Solodurum, Basilea, Schafhusa &
Abbatif-cella. Ex his quattuor, videlicet Ber-
na, Tigurum, Basilea, & Schafhusa, à Romani
Pontificis obedientia recesserunt, & Calui-
nianorum Pseudosynodo Dordracenæ, ma-
gna Germanici nominis infamia, per Lega-
tos suos ann. 1619. subscripserunt; etsi domi-
aliter sentiant. Cæteræ ciuitates omnes Re-
ligionem

ligionem Catholicam Romanam publicè profitentur, & habent Nuntium Apostolicum in vrbe Lucernensi ordinariè residentem. Claronæ tamen, & in alijs aliquot locis, Hæretici Catholicis mixti viuunt. In spiritualibus porrò Heluetij subsunt *Basileensi, Lausanensi, Constantiensi, & Mediolanensi* Episcopis: habentque Mediolani suæ gentis Collegium, à *S. Carolo Borromeo*, institutum.

Præter XIII. Ciuitates, quas dixi, multa apud Heluetios sunt opida suo iure ac legibus vtentia; vt *Bada, Bremgartia, Damasia, Paterniacum Sempachium, Lausana* & alia. Sunt item Præfecturæ decem, quæ cõmuni Cantonum imperio administrantur. Sunt deniq; Socij Heluetiorũ, vt *Abbas S. Galli* cū opido, *Rhati, Valesiani, & Rotuilla*, vrbs Imperialis.

RHÆTI seu GRISONES, vt vulgò vocant, in tria fœdera seu *Ligas* sunt diuisi, quæ tres populos fœderatos complectuntur. Primum fœdus XIX. Communitates, quas inter prima est *Disertina* Abbatia; secundum XX. Communitates, quarum caput est *Curia* vrbs Episcopalis; tertium X. Cõmunitates, quas Iudicia seu Iurisdictiones nominant, cõprehendit. Totus hic tractus Alpinus Romanis olim *Rhætia superior* fuit. Gentem populationibus & raptu viuere assuetam *Augustus* Cæsar, ductu *Tiberij & Drusi*, primus perdomuit, perq; valles ac iuga Rhætica exerci-

tibus Romanis compediarium in Germaniā iter patefecit. Romano Imperio collapsō, Rhæti primò Frácorum Regibus latè dominantibus, òst Germaniæ Imperatorib. subfuerunt. Republica demum Helueticarum ciuitatum constituta, populi isti, montium atque interiectarum vallium incolæ, cœperunt magistratus sibi creare, mutuoq; inter se & sociali fœdere vicinis Heluetijs obstringi. Exinde pacta cum BLANCA MARIA, Duce Mediolanensi, & cum FRANCISCO I. Galliæ Rege, alijsq; postea Regibus & Insu-briæ Principibus inierunt. Quod quidem vtrumque fœdus Rhætos diu claros potentesque fecit; sed Venetum, paucorum amentia atque auaritia procuratum, ipsos in modum torrentis præcipites dedit; alijs exemplo futuros, ne quid temere in Religione aut Republica mutant.

*Veneto fœ-
dere euerſus*

Iam inde ab anno millesimo quingentesimo nonagesimo nono, *Alexander Aiarus*, homo Italus, de fœdere inter Venetos ac Rhætos paciscendo, cum paucis, qui se Rhætorum primores tunc ferebant, seriò egerat. Senatus itaque Venetus id nonnullis probari audiens, ann. 1603. *Ioannem Bapt. Padavinum*, Reipublicæ Secretarium, in Rhætiam misit, qui id fœdus rogaret. Sicque mense Augusto omnia festinanter transacta sunt, & Legatio mox Venetias decreta, quæ, nulla
mora

mora interposita, in viâ se dedit, Merico, tunc HENRICI IV. Galliæ Regis legato, frustra ob stare nitente, ac monēte ne quid innouarent. Sed paucorū, vt dixi, auaritia ac praua consilia præualuerunt: ex quibus nonnulli assercbant, *si fœdus, Venetum fiat, haut esse dubium, quin Euangelium* (sic pestilentem suam doctrinam Nouatores nuncupabant) *breui Venetijs vigeat, & per totā deinde Italiam propagetur.* Id disertis verbis Carolus Paschalius, Merici successor, tradit libro de legatione sua Rhætica, an. 1620. Parisijs edito.

Sed PETRVS HENRIQUEZ, Comes Fontanus, Insubrię pro PHILIPPO III. Rege Catholico Gubernator, Rhætis, qui tam cupidè Venetum fœdus amplexi essent iratus edixit, ne eæ merces, quas Germania & Insubria sibi mutuò suppeditant, deinceps eo itinere, quo itur in Rhætiam, veherentur. Ad Lacum insuper Larium, haut procul ab ostio Adduæ fluuij, qui Vallem Tellenam medius interfecat, tantum nō in agro Rhætico, editiore loco, arcem ædificat, & valido præsidio firmam.

*Fontana
arx ædificatur.*

Exinde domi apud Rhætos turbæ & factiones natæ: ac demum *Salici*, Venetorum fautores, cū Calvinianis præualuerunt *Ioānes* Episcopus Curiensis, *Rudolphus Planta*, *Iacobus Robustellus*, *Ioannes Maria Paraucinus*, & alij proceres Catholici, quòd ab Insubrico fœ-

dere discedendum non putarent, in exilium abacti; *Nicolaus Rusca*, Archipresbyter Sondriensis, diris supplicijs è vita sublatus; alij varijs pœnis affecti aut fugati. Et verò de Catholicis vniuersè actum fuisset, nisi *Robustellus, Paraucinus, Guicciardus*, & alij viri nobiles, ad patriam à seruitute ac tyrannide liberandam, arma corripuissent, & anno huius sæculi vicesimo die 19. Iulij, subita irruptione facta, vt superius retuli, Calvinianos incautos oppressissent, imperiumq; arripuissent suppetijs ex Insubria mox aduocatis.

Actum postea de concordia inter partes, deque Republica pristinum in statum restituenda. Sed dum Lucernæ apud Heluetios, Nuntius Apostolicus, Legati Regum Hispaniæ ac Galliæ, alijque consultant; Rhæti moræ impatientes, Venetorum & Calvinianorum impulsu, copias constant, & anni proximè sequentis autumnò, Mediolanensem agrum hostiliter infestant, opidumque in finibus positum tentant. Sed octingentis circiter per nostros cæsis, & reliquis fugatis, domũ victi turpiter redierunt.

Iniuriam illatam vlturus *GOMESIVS FIGVEROA*, Dux Feriæ, Prorex Insubriæ, cum exercitu mox adfuit, & mense Nouembri *Clauennam* opidum cum arce occupauit. Paulò post *LEOPOLDVS* Archidux, ex Prouincia Tirolensi in Rhætiam mili-

*Clauenna
capitur.*

milite immisso, *Engadinam* vallem (quã *Oe-* *Vallis En-*
gadina.
Curia.
Curia.
 nus fluuius permeat) & *Curiam* Rhætorum
 metropolim in potestatem redegit. Anno
 1622. auspicante, dum ista commentaba-
 mur, nuntiatum est, controuerſias omnes
 Rhæticas esse compositas; Vallem Telli-
 nam suę iuris deinceps futuram, salua XXV.
 millium aureorum pensione annua, Rhætis *Pax Rhætica*
 soluenda; Clauennam eisdem reddendam;
 Episcopum Curienſem in integrum resti-
 tuendum; & Reipublicę administrationem
 penes Catholicos futuram.

Quod Hæreticis & Christianę fidei ho-
 ſtibus est proprium, ADOLPHVS GVSTA-
 VVS, Regni Suecię inuaſor, Calvinistis inſti-
 gantibus, vt Polonos à bello Turcico retra-
 heret, media æſtate *Rigam*, Liunionię metro- *Riga capi-*
tur à Sueco.
 polim, terra mariq; obſedit, ac demũ expu-
 gnauit. Ne porrò latiùs arma ſua Suecus dif-
 funderet, alijsque de cauſſis Polonus, quam-
 quam victor, cum Turca pacem ſanciuit. *Pax Turci-*
ca.
 Inter pacis cõditiones hæc vna fuit, vt Valachię
 & Moldauię Princeps Catholicus detur, Po-
 lono gratus, & amicus futurus.

NIHIL rerum mortaliũ tam inſtabile & fluxũ
 eſt, quàm potentia non ſua vi mixta; lib. 13. Annal.
 ait, Corn. Tacitus. Id vetera, media, & no-
 ſtra ſæcula abundè docuerunt. Inter veteres *Ioab ludi-*
brium for-
 IOAB, vir acer, callidus, ſub Dauidẽ Hebręo-
 rum Rege militiæ Præfectus, & arcanorum *tuna.*

Apelles.

eius consiliorum arbiter, à *Salomone* successore est euersus ac cæsus. Inter Græcos *APPELLEM*, Philippo Macedonum Regi proximum gradu & opibus, (sic vt ab ipso timeretur,) horæ momentum deiecit. Captus enim cum filio mox interfectus est: vt *Polybius* lib. 5. fusè commemorat.

Scianus.

AELIVS SEIANVS apud Tiberium Cæsarem gratiosissimus, & ad instar eius statuis honoribusq; cultus, vnà tandem epistola subuersus est, & caput illud toto orbe secūdum, vt Poeta loquitur, laqueo, suumq; cadauer opprobrijs, lacerationi & vnco præbuit. Similis potētia at-

Plautianus

que exitus *PLAVTIANI* sub Antonino fuit: vt apud Dionem Cassium legitur. Apud

*Aluarius**Luna.*

Hispanos *ALVARVS LVNA* fluxæ potētiæ documentū simile exstitit. Ioannes Castellæ Rex eū super omnes aulicos amabat, opibus titulis ac præfecturis quotidie augebat. Pugnabit id maximā procerum partem, qui hominem nulla militari arte, nullis virtutibus, vna ingenij dexteritate, & asmulatis ad tēpus officijs, ad eum gratiæ ac potētiæ gradū euectum, solumq; alieno nomine regnantem nō ferebant. Rex itaq; alienior factus *ALVARVM*, paucis consciis, in vrbe Burgēti, sagaciter in vincula coniici, per sententiā damnari, caput abscindi, & in foro per triduum

Philippa Catanensis.

ostēdi iussit. De *PHILIPPA CATANENSI*, Regni Neapolitani Senescalla, ex humili fortuna

tuna ad summum euecta, ac demum publicè
 in equuleo torta, Bocacius lib. de casibus vi-
 rorum illustrium, & post cum Petrus Mat-
 thæus scripserunt: quorum posterior & Se-
 ianum nobis ob oculos velut in scēna repre-
 sentauit. CAROLVS CARAFA Cardinalis,
 eiusq; frater IOANNES Paliani Dux, quos ob
 nimiam licentiam patruus *paulus IV.* Pont.
 Max. Vrbe eiecerat, successor *pius IV.* morte
 mulctauit: Cardinali fracto gutture, spiri-
 tus interclusus, Duci caput est amputatum.
 ROBERTVM EBROICVM, Comitem *Essexius.*
 in Anglia; CAROLVM GONTAVTIVM, Ducē Bi-
 ronium, *Bironius.* CONCINVM CONCINIVM, Marchionem
 Ancrensē, eiusq; coniugem *Concinus.* ELEONORAM, in
 Gallia; Melchiorē *Cleselius.* CLESELIVM in Germania;
 IOANNEM BARNEFELTIVM, in Batauia, aliaque
 fortunæ Ludibria, quæ velut manu tetigi-
 mus & oculis vsurpauimus, vel nominasse
 suffecerit. Agmen itaque claudat RODERICVS
 CALDERONIVS, cuius supplicio apud *Caldero-
nius, anno
1621.*
 Hispanos annus hic insignis fuit. Is Antuer-
 piæ patre Hispano, ordinum ductore natus,
 primum apud *Franciscum Rogium Sandoualliū,*
 Lermæ Ducē, qui omnia in aula poterat, post
 apud Regē ipsum *Philippum III.* gratia miri-
 ficè valuit. In Belgica, cū legatione extra-
 ordinaria apud *Albertum & Isabellā Claram Eu-
geniam,* Principes Austriacos, cōiuges, funge-
 retur, absens ab eodē Rege *Comes Oliua,* exin-

de in Hispaniam reuersus *Marchio Septem Ecclesiarum* creatur, & ne quid deesset, cohorti Germanicæ, Regij corporis custodi, præficitur. In natura, moribusq; inerant bona, inerāt item mala: superbia & ambitio, vt solent, hominem in præceps dederunt. Contemptus aliorum, cōmune potentium malū, & aditus difficiles, auri argentique immensa vis, odium illi apud omnes pepererunt. Quod mirum in modū creuit cum Lermæus aula excedere iussus esset. Secessit itaq; Vallisoletum cum eodem Calderonius, ibiq; aliquamdiu hæsit, vniuersa penè Hispania exclamante, & multa, vt fieri amat, crimina ex inuidia affingēte. Demum captus, per biennium & sex fere menses in vinculis fuit. Dati iudices viri integerrimi; qui de varijs criminibus conuictum capitis damnarunt; Trium itaq; mensium pœnitentiā salutari expiatus, Madriti demum publico in foro, innumeraibili hominum multitudine concurrente, carnifici gulam secandam præbuit. Ad supplicij locum mula vectus est, per plateas præcone summam sententiæ, de more, inclamante, his fere verbis: *Supplicium istud huic homini abs Rege esto: quod vnum alterumue è vita tollendum per nefas mandarit, seu consenserit, quodq; alia crimina ac maleficia perpetrarit. Pro his ad supplicium extremum ducitur vt ceteris documentum detur. Qui sic deliquit, pœnas dato.*

dato. In mèdio foro suggestus seu theatrum erat amplū, & cathedra in eo lignea. Eâ post preces, & absolutionem publicè à sacerdote, monacho Carmelita discalceato, acceptam consensâ, manibus pedibusque ligatis, guttur carnifici cultro incidendum fortiter atque intrepidè extendit. Ingēs mox circumstantium ploratus ac gemitus est consecutus. Nimirum variæ rerum imagines, vitæ item ludibria ac iactationes hominum mentibus occurrebant. Nuperæ felicitatis, cùm præfenti fortuna, funestissimoque exitu, comparatio lacrymas etiam inimicis excussit. Cadaver à meridie vsque ad noctem in suggestu relictum, & è domo vicina linteum velut pro paupere acceptum est, quo sepeliretur homo ante regijs penè opibus, ad omnium invidiam, splendidus atque opimus. Sic res humanæ variant. Liceat hic exclaimare, quod Laberius olim dixit;

Summum ad gradum cùm claritatis veneris,

Consistes aggrè, & quàm descendas, decides.

Funus ad Carmelitas discalceatos delatum est, nō alia pompa, quàm ceterorum supplicio affectorum. O sæculum ferax SEIANORVM, eisdemq; nimis infestum! Omnes tamen Seiani esse optant & student, nec mouent exempla quæ ob oculos versantur. Ad eò mortalium animos obcæcat ambitio.

Eodem ipso anno ad exitum vergente,

Luinijs mors CAROLVS ALBERTVS, Dux Luinius, & Regni Galliæ Comestabilis, (quem ex humili loco ad summos honores ac præfecturas LYNOVICVS XIII. Rex, ingenti procerum inuidia ac murmure, extulerat) vivere desiit; vel eo nomine felix, quòd fortuna adhuc blandiente, suo in lectulo mortem obierit, non violentam aut infamem, qualis plerisque nostro æuo apud Principes gratiosis hominibus obtigit. Filium reliquit vnicum ex coniuge, *Herculis Rohanij* Ducis Monbazonij filia, & fratres duos opibus ac præfecturis florentes: quorum senior Vice-domini Ambianensis filiam vnicam, alter Principis Tingriensis filiam natu grandiorum, & Luxemburgici nominis insigniumq; gentilitiorum hæredē, sibi matrimonio iūxit.

Pax Hungarica.

Annum hunc claudat pax Hungarica, inter *Casarem* & *Gaborem* Hūgarosq; Nicoleopoli conclusa, his ferè conditionibus: Ex regno Hungariæ Betlenius cum suis intra dies quindecim abeat; Religio & templa Catholicorum restituatur in integrum; Antistites & reliquus Clerus, atque ipsi etiam Patres Soc. Iesu, domum redeant, ijs legibus, quibus antea, victuri in Hungaria; Betlenius ad vitā titulo Gubernatoris, habeat ea loca quæ sunt vltra Tibiscum fluuium, cis verò, urbē Cassouiensem, cum tribus Comitatibus; Corona regni Tirnauix vsque ad comitia proximo

ximo Aprili celebranda adferuetur, inde tunc ad veterem suum locum, arcem videlicet Polonienſem, ſolenniter referēda; Tir-
nauiā, & alia omnia opida ſeu loca à Betle-
nio occupata, Commiſſarijs Cæſareis ab eo-
dem mox tradantur; Betlenius in ſuper, S. R.
Imperij Princeps futurus, duos in Sileſia
Ducatus, & arces totidem, ad Eſterhaſium,
nobilem Hungarum, antea ſpectantes poſ-
ſideat, certa pecuniæ ſumma, poſt eiſdem
obitum, à nepotibus redimendas.

Dum apud Hungaros & Rhætos de pace
tractatur, Thaborenſi opido ac reliqua Bo-
hemia ad obſequiū compulſa, FERDINAN-
DVS Cæſar, vt eam Prouinciā aſſereret, Præ-
dicantes Calvinianos, qui rebellionis omnis *Caluiniani*
auctores Fredericum Palatinum ad Regnū *Prædicantes*
euocarant, & anno 1618. famoſum libellum *de Bohemia*
publicarant, exilio multauit, diplomate *proſcribun-*
Idibus Decembris Pragæ publicato. *tur.*

Anno ſuperiore exeunte, CHRISTIA-
NVS Brunſuiceniſis, Pſeudo-Epiſcopus
Ha'berſtatenſis, & OTTHO HEMANNVS
Comes Styrumeniſis, copijs Batauicis ſubni-
xi, Comitatu VValdeceſem occuparāt. An-
no 1622. ineūte lōgius progreſſi *Lippiam* opi-
dū, in Comitatu Marcano, ad Lippæ & Pa-
dræ confluētē hntū, & ab Henrico Comite
Bergēſi, iuſſu ALBERTI Belgarū Principis,
pro Cæſare, ante annos aliquot occupatum,
ad de-

ad deditiōem compulerūt. Inde in agrum Paderbornensem ac Monasteriensem excurrentes, ingentibus VVestphalos damnis atque iniurijs affecerunt. Quas vt vindicaret FERDINANDVS BAVARVS, Elector Colonienſis, idemq; Paderbornenſis & Monasterienſis Episcopus, legiones aliquot petiditum ac cohortes equitum conſcripſit.

Alſatiã vaſas Manſfeldius.

Eodem ipſo tẽpore ERNESTVS MANSELDIVS validum equitatum in *Alſatiam* immiſit, & *Hagenoam* urbem Imperialem, quæ multo auro paulo antea libertatem redemerat ingreſſus, maiora inde tormenta aliquot eduxit, perq̃ue Legatum ſuum *Tabernas*, Leopoldi Archiducis eiſdemq̃ue Antitiſtis Argentoratenſis ſedem, obſedit, ſed fruſtra; municipijs ac pagis longẽ lateq; vaſtatis. *Viriatum* Luſitanum, *Eunum* Syrum, *Martinum Roſſemium*, aut *Albertum Brandeburgicum*, cũ ſuis prædonibus; diceres reuixiſſe. Comes Salmenſis, vir ſtrenuus, qui *Tabernis* præerat, valida manu hoſtẽ abeuntẽ aggreſſus, ſexcentos circiter cæcidit aut cepit.

Hæc triſtia: paulò nunc lætiora canamus. FERDINANDVS Cæſar, mẽſe Februario, ſecundam coniugem duxit ELEONORAM, Vincentij Mantuæ Ducis filiã, & Ferdinandi nunc regnantis ſororẽ, nuptijs Oeniponte in Comitatu Tirolenſi celebratis.

IOANNE GVILIELMO, Duce Cliuenſi,
Iulia-

Iuliacensi, & Montensi, Comite Marchiæ & Rauensburgi, anno 1609. sine liberis defuncto multæ ac magnæ de hereditatis iure controuersiæ sunt exortæ, quæ vniuersam pene Europam in partes traxerunt. Septem omnino reperti fuere, qui aut totam hæreditatem, aut eius partem sibi deberi contenderent, *Guilielmus VVolfsgargus*, Comes Palatinus Neoburgicus, IOANNES SIGISMUNDVS Elector Brandenburgēsis, CHRISTIANVS II. Elector Saxo, MAGDALENA Ducis Bipontini vidua, Marchio Burgauia, CAROLVS Dux Niuernensis, & Comes Mauleurius. Hos inter, vt iure, sic & potentia, tres priores eminebant.

*Cliuensis &
Iuliacensis
cōtrouersia*

Vt cuiusque ius, quod pro se singuli allegabant, appareat, gētis stemma, paulo altius deductum, ob oculos ponemus. IOANNES Dux Cliuensis & Marchiæ Comes, ex MARIA, Ducis Iuliacensis & Montensis, Comitissæque Rauensburgi filia vnica, GVILIELMVM suscepit, & tres filias quarum natu grandior SIBYLLA FREDERICO Saxonie Duci an. 1526. nupsit.

GVILIELMVS, trium istorum Ducatum & Comitatus vtriusq; hæres, ex Caroli V. Imp. sorore sustulit IOANNEM GVILIELMVM, de cuius hereditate nunc certatur, & filias quattuor.

MARIA LEONORA, natu maxima, nupsit

psit *Alberto Frederico* Brandenburgico, Borussiae Duci, cuius filiam natu grandiore *Sigismundus* Septemuir Brandenburgensis duxit uxorem, qui iure primogenituræ ac representationis cæteris in hæreditate prior & potior haberi voluit.

ANNAM secundo genitam *Philippus Ludovicus*, Comes Palatinus Neoburgicus, sibi iunxit, ex qua natus est *VVOLFGANGVS GVILIELMVS*, Princeps Neoburgicus, cuius mater anno 1609. adhuc vivebat, eoque titulo sibi tanquam propinquiore hæreditatem deberi iuxta leges Imperij assebat.

MAGDALENA tertio genita in manus convenit *Ioanni* Duci Bipontino, ex Comitibus Palatinis Rheni oriundo.

SIBYLLA natu minima vxor fuit Marchionis Burgaviæ, qui paucis post annis sine liberis obiit.

Saxo Septemuir Iuliacensem, aliasque ditiones, ob defectum hæredis masculi ad patronum seu supremum dominum hoc est, ad Cæsarem rediisse contendebat, & diplomata producebat, sibi suisque maioribus per varios Imperatores cum donatione concessa.

CAROLVS Dux Niuernensis Cliuiam, Comes Mauleurius Marchiam, progenitorum suorum titulo, repetebant.

Bello

Bello tot inter cōpetitores exardescēte, Ordines Prouinciarum, de quibus quæstio; indictis Dusseldorpij Comitij, decreuerūt, vt *Brandeburgico & Neoburgico* Principibus hæreditatis administratio iunctim daretur, donec controuersia plenius definiretur. Diuersa parte *RVDOLPHVS II.* Cæsar, vt Domin^o, Iudex, Sequester & Arbiter, per *LEOPOLDVM* Archiducem, astu Iuliacum opidum cum arce occupat. Saxo per oratores à Cæsare iuris possessionem impetrat, feudūq; Ducatus Iuliacensis a n. 1610. die 7. Iul. accipit, & *VVinedaliã* in Fládria, aliaq; bona apud Belgas sita, actione prius instituta, arripit.

Brandeburgicus & Neoburgicus, qui vniuersas penè ditiones communi manu occuparant, Batauicis, Gallicis, Britannicis, ac Germanicis auxilijs vndequaque aduocatis, anno 1610. Iuliacum à *Leopoldo* occupatum obsederunt, & pulso milite Cæsarco, tandem expugnarunt. Sed vt nec regna nec tœdæ ferunt parem, omnisque potestas impatiens consortis erit, miles Brandeburgicus triennio post, insigni perfidia, Neoburgici Principis cohortem Iuliacum expulit, opidumque cum arce Batauis tradidit.

Ex eo tempore Ordines cōsœderati Belgici Iuliacum validissimo præsidio tenuerunt, ad annum vsq; huius sæculi vicesimum secundum, quo post quinque ferè mensium

*Iuliacum à
nostris cap-
tur.*

obsi-

obsidionem, *Henricus Comes Bergensis, Ambrosii Spinula* Marchionis legatus, praesidarios Iuliacenses fame exhaustos, ineunte mense Februario, ad deditiōem compulit.

Alberti Belgicarum Principis exequia.

Julio mense anni superioris ALBERTVM, optimum Belgarum Principem, ingenti vniuersae Reipub. Christianae damno, ad plures abiisse diximus. Hoc anno in vere, regio verè sumptu atque apparatu, Bruxellis exequiae eiusdem, iussu viduae Ser. mae ISABELLAE CLARAE EVGENIAE, Hisp. Infantis, sunt celebratae, ductaque pompa funebris, qualem à temporibus Caroli V. Caesaris Belgica non vidit. Pompam mirificè decorabat (vt de equis per procures ductis, deque vexillis Regnorum & Prouinciarum per eosdem, instar ferculorum, latis nihil dicam,) TRIUMPHALIS CVRRVS LIBERALITATIS, sex equis generosisimis, per mediam Urbem, à palatio vsque ad basilicam S. Gudilae sacram tractus. In editiore loco sedebat LIBERALITAS, forma augusta; ante illam stabat ara, in qua iacebat *diadema Imperiale*, quod à Septemuiris bis delatum ALBERTVS respuerat, *Corona* item variorum Regnorum ac Prouinciarum, quas idem FERDINAND II. Imp. patrueli suo viueris cesserat. Occasione funeris, optimo Principi ac domino meo, cuius in familia annos ferè sex vixi, Cenotaphum istud conscripsi.

SERE



SERENISSIMO PRINCIPI

ALBERTO

PIO, SAPIENTI, PRVDENTI

A V S T R I Æ A R C H I -
D V C I; B V R G V N D I Æ, L O T H A R I N G I Æ,
B R A B A N T I Æ, L I M B V R G I, L V C E B V R G I,
G E L D R I Æ

D V C I,


F L A N D R I Æ, A R T E S I Æ, B V R G V N D I Æ,
H A N N O N I Æ, H O L L A N D I Æ, Z E L A N D I Æ,
N A M V R C I, Z V T F A N I Æ

C O M I T I,

S A C R I R O M A N I I M P E R I I

M A R C H I O N I,

F R I S I Æ, M A C H L I N I Æ, V L T R A I E C T I
T R A N S I S A L A N Æ, C R O N I N G Æ, S A L I -
N A R V M



NARVM ET ALIARVM DITIONVM

DOMINO,

NEAPOLI IN AVSTRIA M.D.LIX.

IDIB. NOVEMB.

PATRE MAXIMILIANO II.

CAESARE FELICITER NATO,

MADRITI CARPETANORVM, A TENE-
RIS, IN AVLA ET OCVLIS

AVVNCVLI

PHILIPPI II. REGIS CATHO-

LICI SANCTE EDVCATO:

QVI PRIMVS LVSITANIAE PROREX

AB EODEM CONSTITVTVS

REGNVN RECENS PARTVM AC FLV-

CTVANS SVA PRVDENTIA FIRMAVIT;

OLISIPONEM REGNI METROPO-

LIM ADVERSVS ANTONIVM

NOTHVN

ET FRANCISC. DRACVM CLASSIS AN-

GLICÆ DVCTOREM TERRA MARIQ. IRRV-

ENTES FORTITER DEFENDIT;

ERNE-

ERNESTO FRATRE E VIVIS

SVBLATO BELGICAE AC

BVRGVNDIAE

PRIMVM GVBERNATOR, POST PRIN-

CEPS BONO PVBLICO DATVS,

CALETVM, ARDERAM, AMBIANVM

GALLIS ERIPVIT;

HVLSTVM, OSTENDAM, VVACHTEN-

DVNCAM RHENIBERCAM, GROL-

LAM, OLDESALIAM, LINGAM

BATAVIS ADEMIT:

PACE CVM **HENRICO IV.**

GALLIAE

ET **IACOBO** MAIORIS BRITAN-

NIAE REGIBVS INITA,

ET DVODECENNALIBVS INDVCIIS

APVD BELGAS XL. ANNORVM

BELLO FRACTOS FESSOSQ.

PACTIS, IANI PORTAS

CLAVSIT

PACIS QVAM ARMORVM STVDIOSIOR:

REBVS

REBUS IN GERMANIA DEINDE
TVRBATIS

FRATRI MATTHIÆ CÆSARI
VALIDIS CVM EXERCITIBVS
SVPPETIAS TVLIT;

EIVSQUE NOMINE AQVISGRANI,
VESALIAM DVRAM, SVSATVM, LIPPIAM,
CRVCENACVM OPPENHEIMIVM,
TRARBACVM

ALIAQ. AD RHENVM AC MOSELLAM
OPIDA SVBEGIT;

PERDVELLES VNIONIS PSEVDO-
EVANGELICAE PRINCIPES FREGIT,
ET AD OBSEQVIVM

COMPVLIT;
PVBLICAM ECCLESIAE. IMPERII, SVAEQ.
GENTIS SALVTEM STABILIVIT:

QVOD SERA POSTERITAS VIX CREDET,
IMPERII ROMANI CORONAM A VII.
VIRIS BIS DELATAM
RESPVIT;

REGNA HVNGARIAE, BOHEMIAE,
DALMATIÆ CROATIÆ, SCLAVONIÆ,
BOSNIÆ SERVIÆ, HALITIÆ,
VLODOMIRIÆ COMANIE
ET BYLGARIÆ ARCHI-

ARCHIDVCATVM AVSTRIÆ, DVCATVM
SILESIE MARCHIONATVS MORAVIÆ, LVSATIE
ET BVRGAVIÆ COMITATVS HABSBYRGI,
TIROLIS, FERRETÆ ET KIBYRGI
PRINCIPATVM SVEVIÆ

LANDTGRAVIATVM ALSATIE
MARCHIAM TERGESTINAM, PORTVM
NAONIS ET ALIA DOMINIA
HEREDITARIO IVRE AD SE DEVOLVTA

FERDINANDO II. IMP.

PATREVELI SVO

RARO ET INAVDITO HACTENVVS
EXEMPLO DONATIONE INTER VIVOS
CESSIT AC CONSIGNAVIT:

ACERBISSIMIS CHIRAGRAE AC
PODAGRÆ DOLORIBVS, QVOS FORTISSIME,
NVMQVAM QVERVLVS, TVLIT,
DEMVM EXHAVSTVS,

BRVXELLÆ PRID. IDVS IVLIAS
ANNI M. DC. XXI. PISSIME ET
ANIMO QVAM MAXIME TRANQVILLO
QBDORMIVIT.

PROVINCIAE BELGICAE,

OB RELIGIONEM, PIETATEM,

PVDICITIAM, FORTITVDINEM,

CONSTANTIAM, IVSTITIAM,

PRVDENTIAM

ALIASQ. VIRTUTES VERE REGIAS,

QVIBVS TOTO VITAE DECVRSV

CLARISSIMVS, HOSTIBVS ETIAM

GRATVS EXSTITIT,

IN PIENTISSIMVM PATRIAE PARENTEM

AFFECTVS TESTANDI CAVSSA

P. P.